



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KETIGA
MESYUARAT KETIGA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Klinik Komuniti (KK) Station 18 dan Klinik
Kesihatan Ibu & Anak (KKIA) Pengkalan Pegoh**
- *YB. Tuan Wong Kah Woh (Ipoh Timur)* (Halaman 1)
- **Status Pembinaan Infrastruktur Kekal dan
Selesa untuk Klinik Kesihatan Dato' Keramat-
Setiawangsa dan Klinik Kesihatan Setapak,
Taman Sri Rampai**
- *YB. Tuan Nik Nazmi Nik Ahmad (Setiawangsa)* (Halaman 4)

**MALAYSIA
KAMAR KHAS
PARLIMEN KEEMPAT BELAS
PENGKAL KETIGA
MESYUARAT KETIGA**

Isnin, 14 Disember 2020

Mesyuarat dimulakan pada pukul 12.00 tengah hari

DOA

*[Timbalan Yang di-Pertua (Dato' Sri Azalina Othman Said)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Klinik Komuniti (KK) Station 18 dan
Klinik Kesihatan Ibu dan Anak (KKIA) Pengkalan Pegoh**

12.04 tgh.

Tuan Wong Kah Woh [Ipoh Timur]: Terima kasih Tuan Yang di-Pertua. Saya ingin menarik perhatian Kementerian Kesihatan Malaysia (KKM) berkenaan dengan cadangan untuk penggabungan Klinik Komuniti Station 18 dan Klinik Kesihatan Ibu & Anak (KKIA) Pengkalan Pegoh ke satu tapak yang lebih besar bagi menampung peningkatan kadar kedatangan pesakit secara mendadak di kawasan tersebut.

KKIA Pengkalan Pegoh telah wujud pada tahun 1963 sebagai klinik bidan di tapak dan saiz yang sama dengan hari ini dengan keluasan 1,000 kaki persegi. Struktur bangunan tersebut adalah uzur dan tidak selamat diguna pakai kerana kehadiran masalah pembiakan anai-anai yang serius. Selain itu, menurut statistik yang diberikan oleh pihak KKIA Pengkalan Pegoh, kadar kedatangan pesakit telah meningkat secara mendadak dan mempunyai beban kerja sebanyak 100 hingga 180 orang pesakit sehari disebabkan oleh pembangunan kawasan perumahan yang semakin pesat dan banyak di kawasan berhampiran.

Klinik Komuniti Station 18 pula beroperasi sejak tahun 2011 di sebuah lot kedai 24 kaki darab 60 kaki dengan status penyewaan. Dengan pembangunan kawasan perumahan yang semakin pesat, jumlah populasi di kawasan tersebut telah meningkat kepada anggaran 110,000 orang dan kadar kedatangan pesakit adalah sebanyak 150 hingga 200 orang setiap hari.

Dengan ruang yang amat sempit, keadaan di klinik komuniti tersebut menjadi amat sesak dan pesakit terpaksa menunggu di luar premis. Tambahan pula, tiada ruang tambahan untuk penyimpanan stok ubat dan peralatan perkhidmatan sehingga terpaksa menyimpan di bilik rawatan, bilik pemeriksaan ataupun di bilik kaunter pendaftaran.

Selain itu, sebanyak tiga aduan permohonan pembaikan bangunan telah pun diajukan kepada pihak PKD Kinta pada tahun 2018 akan tetapi pembaikan tidak dilakukan dengan sempurna dan masalah kebocoran atap masih kerap berlaku. Saya telah mengadakan perbincangan bersama urus setia kedua-dua klinik tersebut dan mendapati ia adalah lebih sesuai untuk menggabungkan kedua-dua klinik itu di satu tapak baharu bagi menyelesaikan masalah yang ternyata dan memberikan keselesaan kepada pesakit-pesakit di kawasan berkenaan.

Di sini, saya juga ingin menyampaikan cadangan urus setia untuk pelaksanaan KKM iaitu menggabungkan Klinik Kesihatan Pengkalan Pegoh yang mengikut spesifikasi pelan yang direka dan mengikut keperluan sebenar sesebuah klinik kesihatan dengan membeli ataupun menyewa empat lot rumah kedai dua tingkat dengan keluasan 22 kaki darab 70 kaki setiap unit di kawasan Station 18, Pengkalan yang telah dikenal pasti sebelum ini.

Kedudukan lot kedai tersebut adalah tidak jauh daripada kedudukan klinik yang sedia ada. Dengan itu, saya berharap pihak KKM dapat mengkaji dan merealisasikan cadangan yang disampaikan pada hari ini demi kesejahteraan pihak *frontliners* dan juga masyarakat setempat tersebut di kawasan Parlimen Ipoh Timur. Sekian daripada saya, terima kasih.

Timbalan Yang di-Pertua [Dato' Sri Azalina Othman Said]: Silakan Yang Berhormat Timbalan Menteri.

12.06 tgh.

Timbalan Menteri Kesihatan II [Datuk Aaron Ago Dagang]: Terima kasih Yang Berhormat Ipoh Timur. Tuan Yang di-Pertua, Klinik Komuniti Station 18 merupakan sebuah fasiliti yang beroperasi secara sewaan sejak ianya dibuka pada tahun 2012. Purata kedatangan sehari adalah sejumlah 145 orang bagi tahun 2019 dan antara fasiliti klinik komuniti berkedatangan tinggi di negeri Perak.

Fasiliti ini menyediakan perkhidmatan rawatan pesakit luar termasuk rawatan penyakit kronik kepada penduduk di Pengkalan Pegoh dengan liputan populasi berjumlah 50 ribu orang penduduk manakala bagi perkhidmatan kesihatan ibu dan anak, disediakan oleh klinik kesihatan ibu & anak ataupun

KKIA di Pengkalan Pegoh yang terletak 1.3 kilometer sahaja dari lokasi Klinik Komuniti Station 18.

Purata kedatangan bagi klinik kesihatan ibu & anak ini adalah seramai 182 orang sehari pada tahun 2019. Klinik Kesihatan Ibu & Anak Pengkalan Pegoh beroperasi di rumah bidan yang lama bersaiz 214 meter persegi selepas naik taraf klinik desa kepada klinik kesihatan ibu & anak pada tahun 2012, manakala Klinik Komuniti Station 18 beroperasi di satu lot rumah kedai bersaiz 108 meter persegi.

Berdasarkan jumlah kedatangan harian Klinik Komuniti Station 18 dan Klinik Kesihatan Ibu & Anak Pengkalan Pegoh yang tinggi dan melebihi kapasiti fizikal kedua-dua fasiliti tersebut, Kementerian Kesihatan Malaysia telah mencadangkan kepada Jabatan Kesihatan Negeri Perak agar mempertimbangkan perpindahan serta menaik taraf kedua-dua fasiliti ini kepada klinik kesihatan pada tahun 2019.

Kementerian Kesihatan Malaysia juga sedar akan jumlah kedatangan pesakit yang tinggi dan sedang berusaha untuk mendapatkan lot rumah kedai yang bersesuaian untuk menampung kedatangan pesakit luar dan kesihatan ibu & anak yang hampir mencecah 300 kedatangan sehari.

Kementerian Kesihatan Malaysia menyambut baik cadangan agar perkhidmatan kesihatan di Klinik Kesihatan Ibu & Anak Pengkalan Pegoh dan Klinik Komuniti Station 18 disatukan untuk menjadi satu klinik kesihatan dalam usaha untuk menyampaikan satu perkhidmatan yang komprehensif di bawah satu bumbung kepada semua penduduk di kawasan tersebut. Buat masa ini, tiada bangunan berangkai yang dapat menempatkan kedua-dua perkhidmatan ini di bawah satu bumbung manakala bangunan baru yang telah dikenal pasti tidak mendapat persetujuan bomba daripada segi keselamatan.

Bagi perancangan jangka masa panjang pula, Kementerian Kesihatan Malaysia akan berusaha mencari tanah ataupun tapak yang sesuai bagi pembangunan sebuah klinik kesihatan yang baru.

■1210

Cadangan pembinaan projek ini akan dimasukkan ke dalam Rancangan Malaysia Kedua belas setelah pengambilan tanah dilakukan. Sekian, terima kasih.

**Status Pembinaan Infrastruktur Kekal dan Selesa
untuk Klinik Kesihatan Dato' Keramat – Setiawangsa
dan Klinik Kesihatan Setapak, Taman Sri Rampai**

12.10 tgh.

Tuan Nik Nazmi bin Nik Ahmad [Setiawangsa]: Tuan Yang di-Pertua, saya ingin merujuk kepada perkara di atas. Di kawasan Parlimen Setiawangsa ada dua klinik kesihatan yang dalam keadaan sesak dan uzur iaitu Klinik Kesihatan Dato' Keramat Setiawangsa dan Klinik Kesihatan Setapak Taman Sri Rampai. Menurut kakitangan kedua-dua klinik, premis-premis ini bersifat sementara dan menunggu pembinaan infrastruktur kekal yang lebih selesa sesuai dengan keperluan komuniti setempat.

Kedua-dua klinik ini memberi perkhidmatan kepada kawasan penduduk kepadatan tinggi yang meliputi *flat* Projek Perumahan Rakyat (PPR), rumah pangsapuri dan lain-lain lagi. Kerajaan juga dijangka membentangkan Rancangan Malaysia Kedua belas (RMKe-12) untuk tempoh 2021-2025 pada awal tahun hadapan. Maka, saya ingin meminta jasa baik kerajaan terutamanya Kementerian Kesihatan Malaysia untuk menjawab soalan-soalan berikut:

- (i) apakah perancangan pembinaan premis kekal dan lebih selesa untuk Klinik Kesihatan Dato' Keramat-Setiawangsa dan Klinik Kesihatan Setapak Taman Sri Rampai;
- (ii) apakah perancangan perjawatan kakitangan kesihatan doktor dan kakitangan sokongan kesihatan di kedua-dua klinik tersebut dari tahun 2020-2025; dan
- (iii) adakah wujud rancangan menambah bilangan klinik kesihatan di Parlimen Setiawangsa untuk menampung kepadatan penduduk yang tinggi.

Sekian, terima kasih.

Timbalan Yang di-Pertua [Dato' Sri Azalina Othman Said]: Silakan Yang Berhormat Timbalan Menteri.

12.12 tgh.

Timbalan Menteri Kesihatan II [Datuk Aaron Ago Dagang]: Terima kasih Yang Berhormat Setiawangsa. Tuan Yang di-Pertua, Kementerian Kesihatan Malaysia sedia maklum akan keperluan untuk membangunkan fasiliti kesihatan yang kekal agar dapat menyediakan perkhidmatan kesihatan yang

komprehensif dan selesa kepada penduduk ataupun komuniti setempat.

Bagi Klinik Kesihatan Dato' Keramat, proses pembangunan semula klinik ini sedang giat dilaksanakan di atas tapak yang sama. Surat Setuju Terima (SST) telah dikeluarkan kepada pihak kontraktor pada 5 November 2020 di mana tempoh pembinaan projek adalah selama 12 bulan dan dijangka siap pada bulan Disember 2021. Skop projek ini adalah untuk membina klinik kesihatan yang merangkumi perkhidmatan kecemasan, pesakit luar, klinik pergigian dan sokongan klinikal.

Bagi Klinik Kesihatan Setapak pula, Kementerian Kesihatan Malaysia telah pun membuat perolehan sebidang tapak seluas dua ekar di Wangsa Maju untuk membangunkan sebuah klinik kesihatan baru bagi menempatkan Klinik Kesihatan Setapak yang buat masa ini beroperasi secara menyewa di Wisma Sri Rampai. Cadangan pembangunan klinik kesihatan baru ini akan dipohon di dalam Rancangan Malaysia Kedua belas.

Klinik Kesihatan Dato' Keramat merupakan klinik kesihatan kategori tiga iaitu dengan purata kedatangan pesakit sekitar 350 hingga 500 orang sehari. Jumlah perjawatan sedia ada di klinik ini adalah sebanyak 51 perjawatan dengan jawatan pegawai perubatan sebanyak 14 orang. Manakala Klinik Kesihatan Setapak merupakan klinik kesihatan kategori kelas dua dengan purata kedatangan pesakit sekitar 350 hingga 500 orang sehari.

Jumlah perjawatan sedia ada di klinik ini adalah sebanyak 87 perjawatan, dengan jawatan pegawai perubatan sebanyak 28 orang. KKM mengambil pendekatan *right-sizing* dengan izin, melalui urusan pemetaan perjawatan dari semasa ke semasa berdasarkan kepada keperluan perkhidmatan. Sekiranya terdapat keperluan perkhidmatan, pewujudan jawatan di kedua-dua klinik kesihatan sedia ada ini boleh dipertimbangkan sama ada secara agihan semula jawatan sedia ada ataupun pewujudan jawatan baharu atau tambahan secara tukar ganti.

Sebarang pertambahan perjawatan akan dicadangkan selaras dengan keperluan perjawatan mengikut fasiliti yang mana pertambahan jawatan tersebut adalah tertakluk kepada kelulusan perjawatan oleh Agensi Pusat. Buat masa ini telah ada tiga klinik kesihatan di Parlimen Setiawangsa iaitu Klinik Kesihatan Kuala Lumpur, Klinik Kesihatan Dato' Keramat dan juga Klinik Kesihatan Setapak. Kementerian Kesihatan Malaysia belum ada perancangan untuk menambah bilangan klinik kesihatan di kawasan Parlimen Setiawangsa.

Walau bagaimanapun Kementerian Kesihatan Malaysia bercadang untuk memohon pembinaan sebuah klinik kesihatan yang baru di Wangsa Maju yang terletak empat kilometer dari Klinik Kesihatan Setapak bagi menggantikan

klirik ini yang menyewa di Wisma Sri Rampai. Perkhidmatan di klinik ini kelak akan turut dinikmati oleh penduduk Parlimen Setiawangsa. Sekian, terima kasih.

Timbalan Yang di-Pertua [Dato' Sri Azalina Othman Said]: Ahli-ahli Yang Berhormat, dengan itu tamatlah sesi ucapan di bawah Usul Berkenaan Perkara Tadbir Kerajaan mengikut Peraturan Mesyuarat 17. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 12.00 tengah hari, pada hari Selasa, 15 Disember 2020.

[Kamar Khas ditangguhkan pada pukul 12.16 tengah hari]